


楊椒山集

和16
171
2



門八和6
號191
卷2

楊椒山先生集卷之三

詩

節母貞女詩 并序

節母楊侍御匪石夫人祖母貞女其祖姑也

世之論者皆以天下國家之責屬諸君子之身婦
女若無所與焉者及觀斯傳然後知責之在君子
者雖婦女亦足以盡之故張母之不忍忘其夫而
守節終身張女之不忍棄其嫂而相從不嫁以至
於死凡以各盡其心焉耳然而邦之風化世之氣
運時之禎祥恒必因之則其所係也不亦大乎謂

宋三石齋

之無與於天下國家不可也夫姑感嫂節而貞志以決嫂爲姑貞而節之守也益固相觀而善夫固如此苟事君者能如母之不忘其夫則天下皆忠臣矣與人者能如姑之不棄其嫂則天下皆義士矣忠臣義士遍於天下太和將在宇宙間矣則其所係也不尤大乎此又係於觀感者何如耳誠願與君子共勉焉噫世之號爲大丈夫者顧可自喪其志自虧其節反婦女之不若哉謹成小律聊以表厥行而樹之風聲若夫書之以詔後世則猶有太史公在

母爲孤存身未死姑因嫂節老空樓萱階花泣百年
淚漆室人含萬古愁寂寂風侵機杼冷陰陰月暗鏡
臺秋從來多少冠裳客曾似沂陽婦女否

送萬楓潭少叅山東

二月江南氣尙寒石頭城外水漫漫雲連削壁千屏
合日暎離觴兩鑑看近渚晴花香細細傍人風柳絮
團團聖朝此際求言切補牘還思舊諫官千里所

挽任侍御尊人 四川巴縣人

生荔廬外朔風鳴一曲哀吟萬古情五友亭閒山樹
暗三槐堂寂月華明巴人淚落嘉陵水澄野歌連上

蔡城公先澄縣尹後海內知公身不死南臺伯雨振
為上蔡尹故云家聲蔡氏

送史沱村考績

十月征車辭建業三山霜葉照離杯晴烟千里孤城
暮寒雁三聲萬壑哀水國暮雲連渭樹郎官前宿近

中台阿戎詩禮趨庭後為道雷門指日開乃郎嘗從講舉子業

故云

又代作

一上離亭幾度愁十年塵夢歎沈浮悠悠月笛山城
夕漠漠寒雲江樹秋作客南來俱萬里送君北去

孤舟他鄉正有思歸興况復征旌出石頭

送大宗伯兩洲王公考績

台斗光芒臨紫極東風行色動江干春歸吳苑晴花
合天入燕雲曉旆寒禮樂百年開萬國星辰八座肅
千官彤庭舊識尚書履天下蒼生屬謝安

又代韓大司馬送王公

風送老鶯啼禁樹春隨紅旆過江干文昌夜度三台
近玉劍晴浮五月寒一代雲龍虛鼎席百年禮樂屬
春官相逢若問畱臺客為道思歸鬢已殘

送狄道訓導李南峯掌教清水

七載青氈多士服九重紫詔五雲開熙城桃李含春
雨渭水魚龍驚夜雷悵望德星辭璧野相思明月照
秦臺絃歌漫奏別離調衰柳西風無限哀

同門生五十人游臥龍山寺

出門已覺精神爽況復陽回宇宙清野樹含烟迷寺
迴晴山披雪倚雲明

風送榆錢入戶

三月不知春色暮重門深鎖貫城寒東風錯認王侯
院誤送飛錢落枕單

聞築外城二首

萬里河山俱帝業如何謀計只神京備邊自是千年
計塞外誰人築五城

急病須從標上治如何緩處用工夫庸醫費盡篋中
藥待得良醫藥有無

和商中丞獄中生瓜二首

天意昭殊節犴庭產異瓜可憐成落莫徒自吐英華
疎蔓牽瑤草幽香雜瑞花蒼生懸望切何事思烟霞
入獄半爲家真同故里瓜行藏俱夢幻圓寂亦繁華
天遣東陵種雲封西域花機心久已息卽此是烟霞

和商中丞朱葵二首

寂寂朱葵着意栽相投情景自徘徊每因警露含珠
 泣恐誤傾陽帶曉開疎影風移搖夜月晴烟雲擁覆
 西臺幽香暗度重華殿時有游蜂送雨來
 得意葵花斬草栽暫時相對且徘徊百年殊色因誰
 瘦萬古丹心向日開不共羣芳發上苑却憐異種出
 燕臺老天似惜傾城苦欲借天桃雨露來

再次

檢點紅芳荷雨栽平分清景共徘徊醉傾晴日翩翻
 舞笑領天風次第開吟席珠璣超翰苑德星芒彩動
 天臺西山不減東山興佳事還隨花事來

夏午睡胡敬所年兄因見教作此和謝

逐日課程惟有睡百年勲業本無心聖君賜我安閒
 地好做羲皇世上人

又

一息尚存還報主萬年不死是吾心於今祇合昏昏
 睡笑殺當時勲業人

又

踈懶百年還舊癖功名此日負初心本來面目頻頻
 照恐落寰中第二人

賀獄吏孫東渠母壽

予以狂瞽被責下獄幾死者屢賴東渠子左右保護於其間其不屈權奸扶持善類迥出尋常萬萬矣乃堂家書來又諭東渠加意於予中間辭語有名公大人所不能道予感其子之德而嘉其母之賢也仲秋十二日適其母初度因作詩贈之觀者尙其諒予之心乎

南極星輝萊嶼動北堂萱映海天明百年花老秋風冷千里雲孤暮樹平赤圃生烟迴紫氣青鸞傳詔下黃城題詩增我斑裳恨幾遍停思無限情

送宋司獄致仕

名秀山東甯海州人

共說山中好甲子百年林下見高人醒初幻枕俱爲夢歸去此身方屬君昏夜法星辭帝座秋風行色動乾坤西臺多少含冤者一聽離歌淚滿巾

獄中紅苔

寒林淒淒哀怨絕陰雲黯黯鬱秋結西風滿地苔痕紅盡是涓囚冤淚血

朝審途中口吟

風吹枷鎖滿城香簇簇爭看員外郎豈願同聲稱義士可憐長板見親王聖明厚德如天地廷尉稱平過漢唐性癖從來歸視死此身原自不隨楊

讀易有感

眼底浮雲片片飛吉凶消息只幾希自從會得羲皇
易始覺前時大半非

九日崑峯賜飲擬和劉靜脩先生九日九飲
韻

一飲初歌第一歌乾坤萬物屬中和醉鄉能發天然
樂況復幽人情興多

二飲停杯歌二歌西風短鬢任婆婆四時佳興俱堪
賞誰道當秋百感多

三飲幽人發浩歌百年風月屬予多此身不是乾坤

蒂留我蒼天欲若何

四飲須聽第四歌傷人休笑醉顏醜曾經雪浪翻天
湧風落杯中漫起波

五飲起來鼓缶歌萬年宇宙一紅螺閒中看破盈虛
殼聚散浮沈總太和

六飲將酣豪興多仰天長嘯奈吾何片雲忽暗樓頭
月只欲凌虛一拂摩

七飲相關樂趣多風吹萬籟盡笙歌區區懷抱俱春
意笑爾高秋奈我何

八飲自驚飲量過疎狂成癖竟如何縱然痛飲珍珠

酒却恐醅醕語更多
九飲渾忘披翠蓑
聖明恩厚復如何
釀成四海合歡
酒欲共蒼生同醉歌

題殘菊

萬樹紅芳帶露殘
獨憐黃菊對霜看
東君不與花爲
主一任西風落砌寒

見山四首

雲穿石榻丹書濕
亭枕泉崖白晝閒
樽酒相看渾不
厭知君原自見真山

萬里風烟何日盡
百年宇宙幾人閒
春來應有桃千

樹休認天台作故山

市朝自有武陵趣
一息無心一息閒
得意不須登華
嶽樽前卷石亦青山
雲烟收盡酒卮閒
風靜一簾明月閒
不解紅塵尋遠
壑慢將詩思傍青山

小雪

破窻不奈西風冷
況復蕭條一敝裘
疎雪飄殘憂國
淚寒更敲碎貫城
愁悲歌勞擾慚
燕士坐臥渾忘是
楚囚四海尋家何
處是此身死外更
無求

賞功喜作

踏碎塞城誰問罪深居台閣亦加封聖明恩潤同天地不論無功論有功

雪晴

疎狂忘却一身憂思入蒼生始解愁萬事無成憐我拙百年有恨倩誰收每思北闕開宣室羞對西風泣楚囚且喜陰雲薄欲散依稀遙見鳳凰樓

夜感月有懷

鎖合西臺烟霧浮孤燈相對夜悠悠寒欺草榻涼如洗風捲星河動欲流報主獨憐成孟浪論交誰復憶同游相知舊月情如許猶自偷穿入蜃樓

寒夜和敬所韻

乾坤一草閣宇宙半胸襟宿雨千年淚明霞萬古心疎燈暗客夢佳興帶愁吟肌骨渾如鐵寒威任爾侵大風中鳳洲年兄賜顧言及先寄詩扇未到陰陰朔氣滿皇州烈烈悲風暗鳳樓吹合凍雲寒欲雪蹴低霜幹鳥應愁百年執法歸廷尉四海何人憐楚囚聞說右軍曾遠寄蒲葵珠玉莫空投

送張觀海分教偃城十韻

并序

夫人有終日相處志或落落難合終身不相識亦有意氣相孚若素交然者蓋趨向之同與不同故

耳觀海張子予雖未知其爲何如人然自予下獄
素相與者或遠避以示其疎詆排以忌其狂間有
下石肆毒以取悅邀功於權奸之門者觀海乃通
問不絕奔走不逮主張於公議羣聚談論之間雖
時俗輩惕以重禍不恤也視素交者爲何如哉今
之任偃城訓導予感其相知之深而悲其相違之
遠也遂爲詩以贈之噫天不以科第與豪傑俾得
行其志乃濫及予等鬪茸者流不使正人君子相
與以其濟王事固隔絕阻抑之俾離其羣而索其
居良可悲矣然相知以心而不以迹各盡其心以

求自靖雖終身不相見可也否則此言之贈祇貽
泛交之譏今日相知之義將不爲他日相見之羞
乎言至於此又不覺其發

相知每恨未相識聞說遠遊情更親曉日初分溫室
樹文風先度偃城闔稀微殘月明霜劍密羣孤烟逐
晚塵野鳥迴隨征旆沒客袍猶帶曙光新東觀海氣
冲晴漢南望嵩雲接紫宸避俗祗應求吏隱此行原
不爲家貧河陽桃李蓓蕾合洛渚魚龍變化均瓊榻
謾勞悲冷局清朝亦自重儒臣心旌搖落懸雙淚守
拙支離愧一身君愛寒官儂愛死古來天地幾痴人

劉司獄考滿索詩口占以贈之

報最歸來寵命新問君何以答楓宸閒中檢點案頭
簿三載平反多少人

族兄東坡親家鶴峯獄中賜顧同宿二夜感
作

寒燈高照影參差樽酒長吟慰夢思十載交遊仍倚
玉百年骨肉更相知追談雲雨如前日品第親朋異
昔時明月不嫌草榻冷徘徊照我去遲遲

因冷感興

風滿孤城淚滿巾高寒偏傍薄衣人晴烟亦逐陰雲

冷詩思應隨白髮新歸去此身方屬我愁來何事最
傷神邊陲戎馬中原盜惆悵羞稱白靖臣

哀商中丞少峯和徐龍灣韻二首

憂時分外闔何事囚西臺君爲河山死誰悲梁木摧
法星仍近月此日獨憐才魂魄心猶壯奸諛骨已灰
夷夏欲交驩書生虛將壇可憐當日獄乃爾借星冠
白晝燕山暮紅雲渭水寒他年麟閣上遺像許誰看

微雪有感

都城夜半初飛雪臺省應多祥瑞詩眼底餓夫寒欲
死來年總稔濟誰饑

五歲兒入視遣歸不去同宿數夜有感

良知好向孩提看天下無如父子親
我有乾坤大父母孝情不似爾情真

小兒索予畫騎馬官因索詩隨吟父子問答

口號

我已因官累爾何又愛官街前騎馬者
轟烈萬人看懷鶴峯東城因寄

屋梁落月應懷我春草池塘更夢誰
記得別時懸淚眼佯為笑語怕相思

聞有送贈與中官方士而起用者因遣祈雪

祗風不應一首

再入天台雲浦開金丹一粒脫凡胎
逼人嵐氣浮眉宇聞自神仙洞裏來

風捲寒雲落照斜郊原無日不飛沙
可憐萬里瓊瑤雪化作銀杯散宦家

元旦

老天留我報君身惆悵蹉跎又是春
幾度丹心連血嘔數根白髮帶愁新
回思往事真堪笑自幸更生似有神
璞在不妨仍泣獻踟躕無計達楓宸

元旦獄中自製素紙燈籠獄卒以無文彩索

詩賦此

風蹴水晶碎綵聯珠翠浮何如皎皎月是我大燈毬

有月何須燭無雲不怕風借誰竿百尺光照九天中

和鳳洲王年兄韻

未酬拚死恨虛負再生身和淚原非假誼書大任真
寒收燕谷夕烟鎖漢宮春擾擾欲投石君何相問頻

辛聞自立春和平山韻

殘雪禁春亦不遲晴烟送暖入簾幃香飛別院梅初
發影過剏痕日漸移風捲寒雲山曝盡晴歸庭樹鳥

吟詩年來疎懶澁佳句欲報瓊瑤媿項斯

送徐龍灣審錄江南

寥落雲司庭半虛有功此去更何如西臺月下幽人
榻南國星隨使者車寒雁不堪雲暝夕秋風況是葉
飛初秣陵若遇相知問為道疎狂病未除

送李東明審錄北直隸

悵望霓旌拂曙暉嗟君此去故人稀南山判草更誰
易北極恩光伴爾歸晚樹喜承新雨露春風醉舞舊
斑衣漢廷此日須元禮早促仙舟赴帝闈

苦冷

凍日摧寒色狂風送冷塵慢愁衣服薄眼底是陽春

有感

短鬢娑婆烏布巾分明天地一狂人憂時淚應笙歌
落報主心希宇宙新口口共傳知有我孤危不死豈
無神寥寥勛業將蓬鬢虛負當年獻納臣

和趙兵馬海壑韻

殘魂零落又經年盡日悽然掩淚眠嗚鳥似憐人寂
寂空樓獨對月娟娟死生浪寄乾坤外勛業虛思太
嶽巔還草萬言書欲上踟躕何處是堯天

題郭劍泉歲寒松柏卷并序

松柏雖歲寒不凋然色視春夏則少異矣及至春
夏欣然蒼翠若與桃李爭芬芳者視歲寒時又異
焉不知歲寒之色為本色耶春夏之色為本色耶
則松柏者固隨時異矣然則吾人之操當出乎松
柏之上可也劍泉山立之操故常變合一松柏惡
足以擬之耶

君去霜臺無御史君來秋省有刑官百年節操惟松
柏休負當年舊歲寒

送張對溪之任廬州

我期玄素回天力何事亦符此日行幾度為親焚諫

草百僚忌爾著時名鶯啼秦樹晴烟暮旌拂廬雲曙
色明若遇超然同志問為言終不負平生

次梅軒韻

有以夾竹梅花餽予者
梅軒詩贈隨吟謝之

一點丹心一點忠竹花難入萬花叢來年不見青松
友獨喜晴梅相映紅

陳平山鵲噪詩以此答之

惡事先傳應早避喜來不報亦何傷平生最愛鷓鴣聲
好野鵲毋勞噪夕陽

又

屢示災變塞口不言少見祥瑞上
表爭賀鵲之類也有愧老鴉多矣

好音惟恐隔深樹一聽惡聲共彈羅啼鳥亦知隨世

變鴉鳴何少鵲何多

因前作論鴉鵲二首

宇宙到頭俱夢幻生人何必歎雲泥疎狂見慣榮枯
事鴉鵲從今俱慢啼
可厭老鴉常折翅依人喜鵲亦空啼長安公子多飛
彈且向雲山深樹棲

東岡

臨漳才子長安客厭見漳水東流不復回最愛城東
翠嶺山岡起寂寂空谷絕塵埃翠藹林巒非一狀懸
崖削壁列屏障奔騰萬馬下天空俯懷萬寶息雲帳

鬱蒼竹樹半晴陰古洞薜蘿相背向危峯曉掛扶桑
雲礪壑松風日夕聞冥冥雲封羣嶼暗細細泉流百
道分晴月映蘚壁岩花醉夕曛上有十歲不消之冰
雪下有烟霞萬頃之氤氳君生鍾此岡之秀下應嶽
神上應玄宿陟頂雄觀宇宙間目隘八極如區囿君
不見西周岡上鳳凰鳴至今千載流芳聲又不見南
陽岡上臥龍起興復漢祚垂青史羨君青鎖舊知名
十年已償林泉盟如今口口正縱橫漢家能有幾千
城勸君早展籌邊畧休磔區區山水情

苦陰雨

雲黯黯兮鬱愁結雷隱隱兮哀怨絕雨潛潛兮血淚
下水泠泠兮悲聲咽烏亂啼兮憐人苦花零落兮誰
是主欲深入兮無永穴欲高飛兮無翰羽捫胸問心
心轉迷仰面呼天天不語混宇宙兮不分藹烟霧兮
氤氳西風起兮天霽掛遠樹兮夕曛聚還散兮暮雲
平晦復明兮日初晴何時回怒兮天王聖明
江南有梅不見雪冀北雪多梅花稀惟有中州風土
好梅花雪花相映暉孤根深托雲石裏天與清香豈
偶爾不向春光藉豔陽甯隨上苑爭桃李老幹雪鋪

翻助清層冰萬丈影涵明幽姿皎皎塵埃絕琴瑟逼
人冷氣生萬樹叢中呈淡粧百花頭上吐寒芳翛然
遠嶠輕風起吹落乾坤草木香一枝潔素羞粉白娟
娟月姬着新裳一枝黃萼梁園發攢金綴栗色微茫
一枝朱英丹換骨錯認天桃帶淺霜一枝紫蕤蕾初
破曉霜飛落緋衣倚一枝同心竝頭開晴沙酣睡雙
鴛鴦疎影籠月瘦骨插天勁稍穿石枯隙藏烟鶯蝶
不相識風雨更嫵妍冰葩凍蒂應難落一任淒涼羗
管弄前川古瘦清香原太始品題羣花更無比一段
幽閒惟自知豈容凡眼窺紅紫羨君孤梗迴絕俗梅
花如人人如玉得意移來軒後栽松竹交映愜衷曲
樽酒相看花解語似促早上金門去商家正須和羹
材休爲花神滯野墅花落結實調鼎春烹來端可薦
楓宸惟願分種千萬山以解蒼生萬斛之渴塵

臨刑詩二首

浩氣還太虛丹心照萬古生前未了事留與後人補
天王自聖明制度高千古平生未報恩留作忠魂補

遺筆詩字

現在京都宣武門
內都城隍廟懸供

飲酒讀書四十年烏紗頭上有青天男兒欲上凌烟
閣第一功名不愛錢

赴義前一夕遺筆

古人云死有重於泰山死有輕於鴻毛蓋當死而死則死比泰山尤重不當死而死則無益於事比鴻毛尤輕死生之際不可不揆之於道也我一時間死在你前頭你是一箇激烈龔暴的性子只怕你不曉得死比鴻毛尤輕的道理我心甚憂故將這話勸你婦人家有夫死就同死者蓋以夫主無兒女可守活著無用故隨夫亦死這纔謂之當死而死死有重於泰山纔謂之貞節若夫主雖死尙有幼女孤兒無人收

養則婦人一身乃夫主宗祀命脈一生事業所係於此若死則棄夫主之宗祀隳夫主之事業負夫主之重托貽夫主身後無窮之慮則死不但輕於鴻毛且為眾人之唾罵便是不知道理的婦人我打一百四十棍不死是天保佑我那時不死如今豈有死的道理萬一要死也是重於泰山了所惜者只是兩箇兒子俱幼讀書俱有進益將來都成的只怕悞了他一箇女尙未出嫁無人教導看管怕惹人嗤笑我就死了留的你在教導我的兒女成人長大各自成家立計就合我活著的一般我在九泉之下也放心也歡

喜也知感你如今咱一家兒無有我也罷了無有你一時成不的便人亡家破稱了人家的願惹人家的笑你是一箇最聰明知道理的何須我說千萬只是要你戒激烈的性子以我的兒女爲重方可二貞年幼又無兒女我死後就着他嫁人衣服首飾打發他我在監三年他發心喫齋誦經是他報我的恩了不齊着他在家守寡咱哥雖無道理也無別意不過只是要便宜心腸凡事讓他些與他便宜他便歡喜了不可與他爭競二姐四姐要你常看顧他五姐六姐庶母死後也要親近他應民自幼養活他一場也須

分與他些地土其餘家事諒你善處我又說在後面

故不須多言

嘉靖三十四年十月二十六日椒山十書於福堂

論應尾應箕兩兒

人須要立志初時立志爲君子後來多有變爲小人的若初時不先立下一箇定志則中無定向便無所不爲便爲天下之小人衆人皆賤惡你你發憤立志要做箇君子則不拘做官不做官人人都敬重你故我要你第一先立起志氣來

心爲人一身之主如樹之根如果之蒂最不可先壞了心心裏若是存天理存公道則行出來便都是好

事便是君子這邊的人心裏若存的是人欲是私意
雖欲行好事也有始無終雖欲外面做好人也被人
看破你如根衰則樹枯蒂壞則果落故我要你休把
心壞了

心以思爲職或獨坐時或夜深時念頭一起則自思
曰這是好念是惡念若是好念便擴充起來必見之
行若是惡念便禁止勿思方行一事則思之以爲此
事合天理不合天理若是不合天理便止而勿行若
是合天理便行不可爲分毫違心害理之事則上天
必保護你鬼神必加佑你否則天地鬼神必不容你

你讀書若中舉中進士思我之苦不做官也是若是
做官必須正直忠厚赤心隨分報國固不可效我之
狂愚亦不可因我爲忠受禍遂改心易行懈了爲善
之志惹人父賢子不肖之笑

我若不在你母是箇最正直不偏心的人你兩箇要
孝順他凡事依他不可說你母向那箇兒子不向那
箇兒子向那箇媳婦不向那箇媳婦要着他生一些
兒氣便是不孝不但天誅你我在九泉之下也擺布
你

你兩箇是一母同胞的兄弟當和好到老不可各積

私財致起爭端不可因言語差錯小事差池便面紅
面赤應箕性暴些應尾自幼曉得他性兒的看我面
皮若有些衝撞擔待他罷應箕敬你哥哥要十分小
心合敬我一般的敬纔是若你哥計較你些兒你便
自家跪拜與他陪禮他若十分惱不解你便央及你
哥相好的朋友勸他不可他惱了你不讓他你大
伯這樣無情的擺布我我還敬他是你眼見的你待
你哥要學我纔好

應尾媳婦是儒家女應箕媳婦是官家女此最難處
應尾要教導你媳婦愛弟妻如親妹不可因他是官
官人家女便氣不過生猜忌之心應箕要教導你媳
婦敬嫂嫂如親姐衣服首飾休穿戴十分好的你嫂
嫂見了口雖不言心裏便有幾分不耐煩嫌隙自此
生矣四季衣服每遇出入妯娌兩箇是一樣的兄弟
兩箇也是一樣的每喫飯你兩箇同你母一處喫兩
箇媳婦一處喫不可各人合各人媳婦自己房裏喫
久則就生惡了

你兩箇不拘有天來大惱要私下請眾親戚講和切
記不可告之於官要是一人先告後告者把這手卷
送之於官先告者卽是不孝官府必重治他央及你

兩箇好歹與我長些志氣再預告問官老先生若見此卷幸憐我苦情教我二子再三勸誘使爭而復和則我九泉之下必有啣結之報不請察察報味你堂兄燕雄燕豪燕傑燕賢都是知好歹的人雖在我身上冷淡却不干他事俗語云好時是他人惡時是家人你兩箇要敬他讓他祖產分有未均處他若是愛便宜也讓他罷切記休要爭競自有傍人話短長也

你兩箇年幼恐油滑滑人見了便要哄誘你或請你喫飯或誘你賭博或以心愛之物送你或以美色誘你一入他圈套便喫他虧不惟蕩盡家業且弄你成不的人若是有這樣人哄你便想我的話來識破他合你好是不好的意思便遠了他揀着老成忠厚肯讀書肯學好的人你就與他肝膽相交語言必信逐日與他相處你自然成箇好人不入下流也不讀書見一件好事則便思量我將來必定要行見一件不好的事則便思量我將來必定要戒見一箇好人則思量我將來必要與他一般見一箇不好的人則思量我將來切休要學他則心地自然光明正大行事自然不會苟且便爲天下第一等人矣

習舉業只是要多記多作四書本經記文一千篇讀論一百篇策一百問表五十道判語八十條有餘功則讀五經白文好古文讀一百篇每日作文一篇每月作論三篇策二問切記不可一日無師傅無師傅則無嚴憚無稽考雖十分用功終是疎散以自在故也又必須擇好師如一師不愜意卽辭了另尋不可因循遷延致誤學業又必擇好朋友日日會講切磋則舉業不患其不成矣

居家之要第一要內外界限嚴謹女子十歲以上不可使出中門男子十歲以上不可使入中門外面婦人雖至親不可使其常來行走一以防說談是非致一家不和一以防其爲姦盜之媒也只照依我行便是院墻要極高上面必以棘針緣的周密少有缺壞務要追究來厯如夏間霖雨院墻倒塌必卽時脩起如雨天不便亦卽時加上寨籬不可遷延日月庶止姦盜之原酒肉麵果油鹽醬菜必總收一庫房五穀糧食必總收一倉房當家之人掌其鎖鑰家人不得偷盜衣服要朴素房屋休高大飲食使用要儉約休要見人家穿好衣服便要做住好房屋便要蓋使好家活便要買此致窮之道也若用度少有不足便算

計可費多少卽賣田產補完切記不可揭債若揭債則日日行利累的債深窮的便快戒之戒之

田地四頃有餘穀你兩箇種了不可貪心見好田土又買蓋地多則門必高糧差必多恐至負累受縣官之氣也

與人相處之道第一要謙下誠實同幹事則勿避勞苦同飲食則勿貪甘美同行走則勿擇好路同睡寢則勿占牀席甯讓人勿使人讓我甯容人勿使人容我甯喫人虧勿使人喫我之虧甯受人氣勿使人受我之氣人有恩於我則終身不忘人有讐於我則卽

時丟過見人之善則對人稱揚不已聞人之過則絕口不對人言人有向你說某人感你之恩則云他之恩於我我無恩於他則感恩者聞之其感益深有人向你說某人惱你諷你則云彼與我平日最相好豈有惱我諷我之理則惱我者聞之其怨卽解人之勝似你則敬重之不可有傲忌之心人之不如你則謙待之不可有輕賤之意又與人相交从而益密則行之邦家可無怨矣

我一母同胞見在者四人你大伯二姑四姑及我大伯有四箇好子且家道富實不必你憂你二姑四姑

俱貧窮要你常看顧他你敬他合敬我一般至於你
五姑六姑亦不可視之如路人也戶族中人有饑寒
者不能葬者不能嫁娶者要你量力周濟不可忘一
本之念漠然不關於心
我家係詩禮士夫之家冠婚喪祭必照家禮行你若
不知當問之於人不可隨俗苟且庶子孫有所觀法
你姐是你同胞的人他日後若富貴便罷若是窮你
兩箇要老實供給照顧他你娘要與他東西你兩箇
休要違阻若是有些違阻不但失兄弟之情且使你
娘生氣又爲不友又爲不孝記之記之

楊應民是我自幼撫養他成人你日後與他村裏莊
窠一所墳左近地與他五十畝他若公道便與他若
有分毫私心私積錢財房子地都休要與他麩鉞他
若守分到日後與他地二十畝村宅一小所若是生
事心裏要回去你就合你兩箇丈人商議告着他原
是四兩銀子買的他放債一年銀一兩得利六錢按
着年問他要不可饒他恐怕小厮門照樣兒行你就
難管福壽兒甲首兒楊愛兒都是監中伏侍我的人
日後都與他地二十畝房一小所以上各大地都與
他墳左近的着他看守墳墓許他種不許他賣

卷三
覆奏本已上恐本下急倉卒之間燈下寫此殊欠倫
序然居家做人之道盡在是矣挈去你娘看後做一
箇布袋裝盛放在我靈前桌上每月初一十五合家
大小靈前拜祭了把這手卷從頭至尾念一遍合家
聽着雖有緊事也休廢了

刑部見監楊繼盛妻張氏謹奏為籲天乞恩願代夫
死事臣夫原任兵部武選司員外郎因先任本部車
駕諫阻馬市預伐仇鸞逆謀臣聖恩僅從薄謫旋因鸞敗首賜湔洗一歲四遷歷抵

前職臣夫拜命之後啣恩感泣思圖報效或中夜起
立或對食忘餐臣所親見不意誤聞市井之談尙狃
書生之習遂發狂論委的一時昏昧復荷

皇上天高地厚之恩不卽加誅俾從吏議臣夫自杖
後入獄死而復甦者數次剜去臀肉兩片斷落腿筋
二條膿血流約五六十碗渾身衣服盡皆霑汗日夜
籠梃備極苦楚又年荒家貧常不能給止臣紡績織
履供給餉食已經三年該部兩次奏請俱蒙

特允監候是臣夫再蹈於死而
皇上累置之生臣之感佩惟有焚香禱祝萬壽無疆

而已但聞今歲多官會議適與張經一同奏請題奉
欽依依律處決臣夫雖復捐軀市曹亦將瞑目地下
臣仰惟

皇上方頤養冲和保合元氣昆蟲草木皆欲得所豈
惜一迴宸顧下垂覆盆倘蒙鑒臣螻蟻之私少從末
減不勝大幸若以罪重不赦願卽將臣斬首都市以
代臣夫之死夫雖遠禦魑魅親執戈矛必能為疆場
效命之鬼以報

皇上臣於九泉稍有知識亦復啣結無既矣臣無任
激切祈懇惶悚待命之至

楊椒山先生集卷之四

行狀

吳郡王世貞撰

楊忠愍公者諱繼盛字仲芳其先小興州人也當洪
武中小興州數中口有詔盡徙其民內地而公之始
祖百源者得保定之容城遂家焉百源有子述正又
三世為公王父青青生封兵部公富為公父富有子
三人公其季也始兵部公娶於曹而生公兄繼昌矣
已復媵陳女生仲繼美久之曹復舉公公始就襁褓
有奇質兵部公居恒謂人曰日者言吾門當驟大豈

是子也耶然公僅七歲而母曹竟捐館陳女妬日夷公於豎使牧公飯牛牛肥踰年從牧所以間往里塾覩里中兒誦讀揖遜而心好之歸謂兄請得受里塾學兄曰若幼何學公艱然曰夫幼者任牧牛乃不任學兄言於兵部公竒而聽之學公竟學然不廢牧也十餘歲而兵部公亦捐館久之兄坐邑賦踐更公遂往代踐更至十三而從師受經爲舉子業漸有聲十八補邑諸生踰冠讀書於邑寺僧舍自勵刻苦恒讀至夜分燈且盡暝坐而思屬文誼會寒無下襦遠屋行且溫誦日所臆令脛以上微暖得稍假寐五鼓起汲水手凍屬於綆呵之乃解其明年春諸僧病疫且甚同舍生俱亡去公獨曰吾去僧誰爲治湯藥者乃吾死僧矣則爲之親爨事問醫調藥餽僧以次愈而兄病疫亦作報至公於是奔波歸日夜不解衣而扶侍亦愈時人異之爲語曰疫無鬼以爲不信視楊氏子公旣爲諸生數從有司薦不利家益貧然益以勤苦其術業益進遂舉庚子鄉試明年辛丑下第歸當入太學公兄繼昌計以入太學當捐貲爲負笈費不可則乘公出而強公婦以八石穀廢著居曰毋溷乃公爲也公游太學再試居首爲名高故薦紳大夫遞

館穀之稍稍具橐中裝而婦治農有天幸輒歲公竟
事歸爲酒召其姻族奉兄觴曰始弟所以默而從廢
著者懼不勝負筮費爲兄累今幸有餘錙足佐兄朝
夕請得復從宇下爨可乎兄愧然許會復當計偕有
司以三十金爲公費公悉推兄使輸邊獲散官級曰
吾道近可徒也甲辰復下第再入太學時祭酒華亭
徐公異公材爲指授經義甚悉公遂以明年之丁未
舉進士高第授南京吏部驗封司主事及與考功郎
鄭公曉游鄭公者素負鑒以裁一世士而獨愛重公
謂人曰夫夫非吾所及也因爲公語古今成敗得失
與國家章典大者公主事驗封而郎中以缺告驗封
掌諸郡邑吏入肄事者公已夙鉤得其弊乃爲嚴登
藉序先後革冒替其試吏毋得假手上下翕然稱服
公旣以曹事簡稍用力於詞章久而厭之而是時關
西韓公邦奇爲兵部尙書韓公大儒公始從之而受
樂三月而得其數乃謂韓公曰樂體於理而用於聲
者也有器而後有聲夫器理所寄也乃構桐竹絲漆
手製管和矣已製琴已瑟若簫笙塤箎之類諧而合
奏之若一以復韓公公大悅曰技更進是乎始吾語
汝吾欲制十二律之管管各備五音七聲而成一調

何如公退而凝思廢食寢者三日夢大舜坐投公以金鐘使之擊而謂之曰此黃鐘也公醒而汗恍若悟者起篝燈促複製管至明而成者六已而十二管成韓公撫膺高蹈曰得之矣始吾輯志樂成而九鶴飛舞於庭其應乃在子耶韓公既歸老語公樂不足以盡子吾爲子悉吾天文地理太乙六壬奇門兵陣之書而授子公乃徧習焉而會諸僚有講聖門之學者公又從講學人或謂此曹子什伍賣聲譽奈何中之公不顧曰道在人志耳子不聞夫商丘中誘而投火以得寶者耶庚戌秋口大舉躡京師而南南中議發兵入援嘆惜當往者公奮曰主辱臣死卽無一兵從我丈夫獨身取單於耳會口退之明年公滿三載考道由山東謁曲阜孔顏氏廟徘徊於俎豆之間久之登泰山絕頂望雲氣慨然歎天體之不盡益有志於學以明年辛亥春抵吏部甫見卽遷爲兵部車駕司員外郎時咸甯侯仇鸞以雲中騎勤王驟得兵政天子虛已聽之而侯鸞驕且內畏口口請於二邊互市市馬侯鸞主之奉以中國弊帛議遣使公乃上疏條論其十不可五謬大畧謂互市市馬者和親別名也口踐躡我陵寢虘劉我赤子而先之和忘天下之

大讎其不可者一矣往北伐之詔下天下曉然知
聖意日夜輸其兵食以助京師而忽更之曰和失天
下之大信其不可二矣以天朝堂堂而下與□□互
市冠履倒置損國家之重威其不可三矣天下豪傑
日夜磨厲其長技以待試而甘心於□今謂國家厭
兵無所用之曠豪傑效用之志其不可四矣庚戌之
變天下頗講習兵事既久無故以和弛之使邊鎮美
衣媮食而自肆懈天下飭武之志其不可五矣往者
邊臣私通□吏猶得以法裁之今導之使通其不勾
結而危社稷者幾希開邊方通□之門其不可六矣

伏戎之莽在在有之往者厭國威不敢肆今謂縣官
懼而奉□乃爾其何有於我開百姓不靖之漸其不
可者七矣□昨深入時我雖不敢逆一矢然彼知我
無備也備之已半歲而互市終之彼謂我尙有人乎
長□□輕中國之心其不可者八矣□狡詐出沒叵
測我竭財力而輦之邊□負約不至未可知也因互
市而伏兵若吐蕃清水之盟未可知也或互市畢卽
入寇入寇矣而駕誘它部我旣無所攝問之未可知
也或以下馬索上價或責我以他賞或望我以苛禮
未可知也墮□□狡詐之計其不可九矣大約歲帛

數十萬得馬數萬匹十年之後口馬少而我帛亦不繼將何以善其後不爲國家深長之計其不可十矣凡爲謬說者有五不過曰吾外假馬市以羈縻之內寬吾以脩武備夫口至無饜也至無恥也吾安能一一而應之是終兆釁也且吾果欲脩武備而何所藉於羈縻此一謬也曰吾乏馬吾藉此以資吾軍則又非也旣和矣無事戰矣得馬將焉用之且口安肯捐其壯馬而予我此二謬也曰互市不已彼且朝貢夫至於朝貢而中國之捐貲以奉口益大矣此三謬也曰口旣利我必不失信又非也夫中國之所開市者能盡給其衆乎不給則不能無入掠此四謬也曰兵危道也佳兵不祥夫敵加於己而應之胡佳也人身四肢皆癰疽毒日內攻而憚用藥石可乎此五謬也夫此十不可五謬非唯公卿大臣知之三尺童子皆知之然而有爲

陛下主其事者蓋其人內迫於國家之深恩而外懼口之重勢內迫國家之深恩則圖倖目前之安以見效外懼口之重勢則務中彼之欲以求寬然公卿大臣知而莫爲一言止之者止則身任其責而危開則人任其責而安

陛下宜振獨斷發明詔悉按言開市者選將練兵聲罪致討不出十年臣請爲

陛下勒燕然之顛懸俺答之首於藁街以示天下萬世疏奏上壯之下相嵩等八臣議咸唯唯侯鸞桃憤曰豎子目不知口宜其易之乃密疏云云上意遂中變下公錦衣獄就置訊公持論侃侃不屈獄具貶狄道縣典史狄道在陝西之臨洮山中其民不畏法而狄道令嚴重公不敢煩以事公請曰子典史也不敢有他請請得從典史事令賢其意而許之公務益其敬其職冬月受請讞竟莫弗倦臨洮民翕然稱

楊公神明卽監司以難獄猶豫者輒問楊典史云何不以及令也公少暇則進邑諸生爲講說文義大指諸生人人得意恨見公晚而公捐俸祿益之束贄買東山超然臺剪棘立書院以居諸生祀伏羲而下至周孔配以濂洛關閩諸賢狄道之旁地故多回夷其子弟悉習梵典公召而約束焉爲立二經師而身誨其稍異者三十人諸生日益衆無所取食公乃集邑吏搜飛酒者伏糧得三十石而鬻所乘馬及婦張夫人服裝買民間最重賦地二千畝白於府以伏糧予之乃倣古井田意割授諸生父兄使畝入粟以給筆

札及婚喪之費又買城西廢圃使茹蔬而引洮河之水灌溉之地益以肥饒給諸生勝讀矣邑故有煤山生番制之不能開而仰給薪於二百里外公挾衛指揮單騎往召生番諭之咸服曰楊公卽須吾窮廬且舍而况此煤山耶邑遂不苦薪時有稱巡按御史使下邑責鬻褐者公持其人曰御史無責褐也責褐卽御史吾且得請之其人大窘郡守尉爲旁解乃得脫去自是無來責邑褐者矣公之爲典史狄道將二年其吏民愛之呼楊父諸生或稱關西夫子而口數敗約入寇侯鸞奸復露罪至族公言大讎

天子思之稍遷山東諸城令之諸城月餘卽遷南京戶部主事之南戶部三日而遷刑部湖廣司員外郎道復調兵部武選當是時相嵩最用事惡侯鸞刺骨而善公筴以不得立貴之爲恨然天下之惡相嵩甚於惡侯鸞公始遷刑部卽欲移疾歸旣復調兵部則中夜起坐自詫曰

天子遇我厚矣我何以報塞張夫人從旁笑曰公休矣且歸耳公曰何謂也張夫人曰夫一侯鸞而困公幾死今相嵩父子百鸞也公何以報爲休矣且歸耳公霍然大悟曰吾乃今而知所以報也於是日夜密

具疏謀論相嵩抵任之十二日而疏成爲癸丑元日將上之會上方怒諸給事有所行遣公已抵闕門矣趨出更十五日而齋齋三日乃上疏其辭曰臣先因阻馬市罪應下獄逆鸞威屬問官鍛鍊必欲置臣於死

陛下特寬其罰不二年間復至今職夫以孤直罪臣天地隆恩不死逆鸞之手而又遷轉如此之速則自今已往之年皆當具朝服當具朝服當具朝服陛下再賜之年而臣身亦陛下再生之身也臣夙夜祗懼思所以捨身圖報蓋

未有急於請誅賊臣者方今在外之賊惟□□爲急在內之賊惟嚴嵩爲最賊有內外攻宜有先後未有內賊不去而可以除外賊者故臣請誅賊嵩當在剿絕□□之先且嵩之罪惡貫盈神人共憤徐學詩沈鍊王宗茂等常劾之矣然止皆言嵩貪污之小而未嘗發其僭竊之罪嵩之奸佞又善爲撫飾之巧而足以反誣言者之非陛下之仁恕又冀嵩之感恩而歸於正故嵩猶得竊位至今爲嵩者乃日懼言者之多而益密其彌縫幸於得

陛下之留而愈無忌憚衆惡俱備四端已絕幸賴

陛下誠敬格於

皇天天心仁愛屢示災變以警去年春雷久不聲占云大臣專政夫大臣而專政孰有過於嵩者又冬日下有赤色占云下有叛臣凡心不在君而背之者皆叛也夫人臣而背君又孰有過於嵩者如各處地震與夫日月交食之變其災皆當應賊嵩之身乃日侍左右而不覺上天仁愛警告之心亦恐怠且孤矣不意陛下聰明剛斷乃甘受嵩欺人言不見信雖

上天示警亦不省悟以至於此也臣敢以嵩之專政叛君十大罪爲

太祖高皇帝詔天下罷中書丞相而立五府九卿分理庶政殿閣之臣惟備顧問視制草故載諸祖訓有曰以後子孫作皇帝時臣下有建言設立丞相着本人凌遲全家處死此其爲聖子神孫計至深遠也及嵩爲輔臣儼然以丞相自居挾陛下之權侵百司之事凡府部題覆先面稟而後敢起稿嵩之直房百官奔走如市府部堂司嵩指使絡

釋不絕一或少違顯禍立見及至失事又駕罪於人
是嵩雖無丞相之名而有丞相之權有丞相之權而
無丞相之責天下知有嵩而不知有

陛下此壞

祖宗之成法一大罪也權者人君所以統馭天下之
具不可一日下移臣下亦不可毫髮踰僭嵩一以票
本自任遂竊威福之權

陛下用一人嵩卽先謂之曰我薦之也及黜一人嵩
又號於衆曰此人非我所親故罷之

陛下宥一人嵩卽謂之曰我救之也及

陛下罰一人嵩又號於衆曰此人得罪於我故報之
嵩竊

陛下之喜以市己之恩假

陛下之怒以彰己之威所以羣臣感嵩甚於感

陛下畏嵩甚於畏

陛下臣不意

陛下之明斷乃假權於賊手如此此竊君上之大
權三大罪也善則稱君過則歸己人臣事君之忠也
書曰爾有嘉謨嘉猷則入告爾后於內爾乃順之於
外曰斯謨斯猷惟我后之德人臣不敢彰己之能以

與君爭功如此

陛下苟有一善嵩必令子世蕃傳於人口 上原無此意我議而成之又將 聖諭及嵩所進揭帖刻板刊行爲書名曰嘉靖疏議欲使天下後世謂陛下所行之善盡出於彼而後已也人臣善則稱君之忠果若此乎此掩 君上之治功三大罪也

陛下之令嵩票本蓋取君逸臣勞義也嵩何所取而令子世蕃代票又何所取而約諸義子趙文華等羣會而票擬屢更數手機密豈不漏泄所以題疏方上滿朝紛然已知天語既下前講若合符契如錦衣衛

經歷沈鍊劾嵩疏

陛下發大學士李本票擬本即使所善問世蕃乃同趙文華擬票停當令文華袖入封進此人所共知也卽劾嵩之疏世蕃猶得票擬餘可知矣是嵩旣以臣而竊君之權世蕃復以子而弄父之柄百官孰敢不服天下孰敢不畏故今京師有大丞相小丞相之謠此縱奸子之僭竊四大罪也邊事之廢壞皆原於功罪賞罰之不明嵩爲輔臣乃爲壟斷之計欲令孫昌功於兩廣故先置伊表姪歐陽必進爲總督姻親平江伯陳圭爲總兵御史黃如桂爲巡按朋奸比黨請

張爲幻先將長孫嚴效忠昌兩廣奏捷功陞所鎮撫
又昌瓊州一人自斬七首級功造冊繳部效忠告病
乃令次孫嚴鵠襲替鵠又告併前效忠七首級功加
陞錦衣衛千戶今任職管事效忠嚴鵠皆世蕃豢養
乳臭子也何嘗一日離左右而至軍卽至軍亦豈能
一人自斬七首級而假報戰功濫竊官爵以故歐陽
必進得入爲工部尙書陳圭托疾得掌後府黃如桂
得驟遷太僕寺少卿是嵩旣竊其職其人視其職

陛下爵賞之權以官其子孫又以子孫之故顯拔其
私黨此俑旣作倣效成風蔣應奎等令子昌功杖死
遣戍皆嵩有以倡之也夫均一昌功也在蔣應奎等
貪昌科道則劾之在嵩貪昌人所共知科道乃不敢
劾嵩積威足以箝天下之口可知矣此昌朝廷之軍
功五大罪也逆賊仇鸞總兵甘肅貪虐論革嘉靖二
十九年大同帥張達等敗沒正口口竊伺之時使嵩
少有爲國家之心豈肯用此債帥以寄干城而世蕃
乃受鸞銀三千兩指逼兵部薦爲大將及鸞昌哈舟
兒軍功世蕃亦藉以陞應嵩父子於時嘗自誇以爲
有薦鸞之功矣及鸞勢出嵩上反肆凌侮故嵩嘗自
歎以爲引虎遺患後又知

陛下有疑鸞之心恐其敗露連累始互相誹謗以混初黨之跡以眩陛下之明然不知始而逆鸞之所以敢肆者恃有高在終而嵩與逆鸞之所以相反者知

陛下有疑鸞之心故耳是勾口背逆者皆鸞也而受賄引用鸞者嵩與世蕃也進賢受上賞進不肖受顯戮嵩之罪惡又出鸞之上矣此引背逆之奸臣六大罪也口口犯內地深入經時兵法擊其墮歸此一大機也而兵部尙書丁汝夔問計於嵩嵩乃曰京邊不同勢敗於邊可掩也敗於京不可掩也且口飽自退耳故汝夔傳令不戰及

陛下逮治汝夔求救於嵩嵩又曰無恐也吾爲密疏保若及汝夔臨刑而後知爲嵩所給乃大呼曰嚴嵩誤我矣是嵩以不戰給國而以死給汝夔也此誤國家之軍機七大罪也黜陟者人君之大權非臣下可得專且私也刑部郎中徐學詩以論劾嵩與世蕃革任爲民矣嵩於考察京官之時逼令吏部將學詩兄中書舍人徐應豐罷黜荷蒙聖明洞察留用夫應豐乃陛下供事內廷之臣嵩猶敢肆其報復之私則在內

之臣遭其毒手者又何可勝數耶戶科都給事中厲汝進以論劾嵩與世蕃降爲典史矣嵩於考察外官之時復逼吏部將汝進罷黜汝進言官也縱言不當陛下旣降其官矣其爲典史則無過可指也嵩乃以私怨罷黜之則在外之臣被其中傷陷害者又何可勝數耶夫考察大典也

陛下持之以激勵天下之人心賊嵩竊之以中傷天下之善類此專黜陟之大柄八大罪也今府部之權皆撓於嵩矣而吏兵二部大利所在尤其所專主者嵩於文武之遷陞不論人之賢否惟論銀之多寡各官之任亦通不以報國爲心惟日以賄嵩爲事將官旣納賄於嵩不得不剝削乎軍士所以軍士多至失所有司旣納賄於嵩不得不濫取於百姓所以百姓多至流離利歸一人毒徧天下人人思亂皆欲食嵩之肉

皇上雖屢加撫卹之恩豈足以當嵩殘虐之害哉如是臣恐天下之患不在口口而在域中此失天下之人心九大罪也先朝風俗淳厚近古自逆瑾用事始一少變至嵩爲輔臣諂諛欺君貪污率下通賄慝懃者貪如盜蹠而亦薦用奔競疎拙者廉如夷齊而亦

罷黜守法度者以爲固滯巧彌縫者以爲有才勵節
介者以爲矯激善奔走者以爲練事卑污成套牢不
可破雖英雄豪傑亦入套中從古風俗之壞未有甚
於此時者究其本源嵩先好利天下所以皆尙乎貪
嵩先好諛天下所以皆尙乎諂源之不潔流何以清
風俗不正而欲望天下之治得乎此壞天下之風俗
十大罪也嵩有十大罪昭人耳目以

陛下之聰明而若不知者
陛下待臣子之心出於至誠賊嵩事

陛下之奸入於至神以至神之奸而欺至誠之心無
怪乎墮其術中而不覺也臣請更以嵩之五奸言之
知

陛下之意向者莫過於左右侍從嵩欲托之以伺察
聖意先用重賄結納於

陛下一言一動無不報嵩報則酬以重賞凡聖意所
愛憎舉措嵩皆預知故得遂其逢迎之巧以悅

陛下之心

陛下悅嵩之能盡合而謂之才不知其先有人以通
之也是

陛下之左右皆賊嵩之間諜其奸一也通政司納言

之官嵩欲阻塞天下言路故令義子趙文華爲通政使凡疏到文華必將副本送嵩與世蕃先閱而後進疏內情節嵩皆預知少有干涉卽爲彌縫聞御史王宗茂劾嵩之疏文華停留五日方上故嵩得以展轉摭飾是

陛下之納言乃賊嵩之警犬其奸二也嵩旣內外彌縫周密所畏者厥衛衙門緝訪之也嵩則令世蕃將厥衛官籠絡迫結姻親夫旣與之親又豈忍發露其惡不然嵩籍江西去京四千餘里而結親於此欲何爲哉不過假婚姻之好以遂其掩飾之計耳

陛下試詰嵩諸孫所娶者誰女立可見矣

陛下之爪牙乃賊嵩之爪葛其奸三也厥衛旣已親矣所畏者科道言之也嵩於進士之初非私屬不得與中書行人之選知縣推官非通賄不得與給事御史之列考選之時又擇熟輒圓融出自門下者方補科道旣選之後或入拜則留其飲酒或出差則爲之餞饗或心有所愛憎則授之論刺爲嵩使令至五六年無所建白卽陞京堂方面夫受嵩之恩旣如此附嵩之效又如彼以故科道諸臣甯忍於負陛下而不敢忤於權臣也是

陛下之耳目皆賊嵩之奴僕其奸四也科道雖入其
籠絡而部臣如徐學詩之類者亦可懼也嵩又令子
世蕃將各部之有才望者俱網羅門下或援之鄉里
或托之親識或結爲兄弟或招爲門客凡部中有事
欲行者先報世蕃故嵩得預爲之布置各官少有怨
望者亦先報世蕃故嵩得早爲之斥逐連絡蟠結深
根固蒂合爲一黨互相倚附各部堂司大半皆嵩心
腹
陛下自思左右心腹之人果爲誰乎此真可爲流涕
者也是

陛下之臣工多賊嵩之心腹其奸五也夫嵩之十罪
賴此五奸以彌縫之五奸一破則十罪立見
陛下何不忍割愛一賊臣顧忍百萬蒼生之塗炭乎
臣前諫阻馬市謫官邊方往返一萬五千餘里道途
艱苦妻子流離宗族賤惡家業零落幸復今官僅將
一月臣雖至愚非不知與時浮沉可圖報於他日而
顧履危昌險攻難去之臣覬難成之功取必至之禍
哉顧

陛下以再生之恩賜臣臣安忍不捨再生之身以報
陛下况臣狂直成性忠義鬱結每恨壞天下之事者

惟逆鸞與嵩鸞已殛死獨嵩尚在嵩之奸惡又倍於鸞將來爲禍更甚舍此不言更無可以報

陛下者

陛下聽臣之言察嵩之奸或召問二王令其面陳嵩惡或詢諸閣臣諭以勿畏嵩威重則置之憲典以正國法輕則諭令致仕以全國體賊臣既去豪傑必出賞罰旣明軍威自振口口畏

陛下之聖斷知中國之有人將不戰而奪其氣聞風而喪其膽矣內賊去外賊除其致天下之太平何有疏奏 上恚公戇而相嵩方以他事得 上意構公

復下錦衣獄詰公何自引二王公對曰非二王疇不懾嵩者且王家事渠甯不憂爲嵩敗耶獄具詔杖至百有遺公蚘蛇膽謂服之可以禦杖公笑曰吾自有膽何蚘蛇爲却之第飲一卮酒畢受杖送司寇獄公創甚至夜半而蘇獄吏內畏嵩屏去藥食公碎甕碗手破諸腐肉血稍稍起司寇當公詐傳親王令旨絞中外駭且怪以人臣阿私侮三尺不宜至此而郎史君坐稍持獄謫矣佐重公辟者侍郎王學益遷矣公以冬月行論從容讀書不輟且曰丈夫會有死死分耳天得無稔嵩僂之耶將奈國體何是時海內士大

夫陰傳錄公疏至紙爲貴而公當出朝審諸中貴人
夾道指目公勞以酒肉袖白金而遺之至柩道不得
發公悉謝不受或謂中貴人是不齟齬若曹者曰楊
公天下義士今得見之幸也卽齟齬固當而又竊指
公三木歎曰奈何不以囊相嵩而囊楊公也 上意
且惜欲免之居二歲而獄有失律逮冬月行盡人藉
藉謂公且不免有爲公居間相嵩者曰公不憂萬世
耶相嵩曰吾行當爲救之且卜之其人復前說曰卜
之鬼乎人乎夫人則奚卜也而胡植鄆懋卿在旁曰
不可公不覩夫養虎者耶乃白遺患相嵩者頷之已
更有蜚語聞上竟以十月晦論死公臨當赴義出所
著年譜授其子應尾曰後十年可開也後爲詩二章
其一曰浩氣還太虛丹心照萬古生前未了事留與
後人補其二曰天王自聖明制度高于古生前未報
恩留作忠魂補蓋慷慨曼聲長嘯以沒公沒之七年
而相嵩奸狀大露其上采御史鄒君應龍言逐之歸
戍其子世蕃又二年而御史林君潤白發世蕃大逆
狀論棄市籍其家貲巨萬萬嵩削籍寄食於人以死
又三年而 天子崩遺詔褒錄諸死諫者吏部以公
名居首贈太常少卿賜錄一子太學生無何用給事

陳君瓚言賜公諡諡忠愍用御史郝君杰言賜祠公於保定額曰旌忠嗚呼國家之所以爲楊公者足矣當公再上疏再得罪以死天下稱公之忠痛公之冤而不知公之功實在社稷天下知先帝之怒公至侈其身而不知再用公之言以格鸞嵩之奸後天下知

今上仁聖數用言官言褒卹公而不知陰體先帝之遺意嗚呼公可以含笑地下矣公生於正德丙子五月十七日歿於乙卯之十月晦春秋四十配張夫人胡村處士杲女婉孌有志操嘗上書請代公

死報聞丈夫子二長卽應尾太學生娶教諭李君九臯女次應箕娶都御史王君遴女王君蓋爲兵部時聞公下獄慨然以女許聘者也而又有嘗許公婚而自悔匿避弗顧去者令其人在不重悔恣然下汗耶天子旌公之明年而應尾謀改葬公持公所自著年譜徒步冰雪中八百里而謁世貞曰先子之沒嚮者實藁葬焉而未有誌銘也將渡江以請於少師華亭相公而藉吾子之狀爲先容不佞謝弗文應尾泣曰先子之遺意也不佞重謝弗敢蓋忠愍之沒相嵩實怒不佞而嫁於先君子有至痛焉應尾重泣曰不得

子之狀無以辭於少師公也先子卽死且不瞑旣而
王君以書來曰子爲狀而乞誌銘於鉅公大賢忠愍
公意也不佞不獲已爲著狀而淚泫淫流弗已至於
序錄公遇難事則大慟幾絕投筆者三矣其辭之不
能次固宜也公所上劾相嵩疏傳人人國史記之不
佞故直書其文而稍去其浮漫者如右

隆慶戊辰冬十二月同年生吳郡王世貞撰

明兵部武選員外郎贈太常少卿諡忠愍公

墓誌銘

華亭徐階撰

公諱繼盛字仲芳別號椒山忠愍者諡也 國朝之
制非大臣不得與於易名公位下乃得諡者今
皇帝御極遡觀化源謂公死諫節甚偉宜尊顯以勵
士大夫故奉遺詔贈公太常寺少卿廕子應尾爲國
子生而特賜今諡其義則取諸危身奉上在國逢難
云初公舉嘉靖丁未進士授南京吏部驗封主事師
事大司馬苑洛韓公盡通其天文地理太乙壬奇兵

陣之學名聲重一時辛亥遷兵部車駕員外郎當是時大將軍仇鸞驕然心憚□欲利啖之以緩兵請與□爲馬市有成議矣公上疏斥其不可者十辯其說之謬者有五鸞因詆公撓邊計惑衆心詔錦衣衛逮公置訊獄具貶狄道典史踰年擢知諸城尋遷南京戶部主事又遷刑部員外郎調兵部之武選嘗獨居深念至夜分配張安人問其故公曰吾受 上恩思有以報耳安人曰嚴相國方用事此豈君直言時耶公不應而心自計欲報恩其道莫如去奸人使不得亂政遂以癸丑正月疏論少師嚴嵩十罪五奸請召

二王問狀公意以嵩在位久其黨與布滿中外

上卽問必不肯言而今

皇帝以明聖在東府冀一名問可盡得其實嵩更借以爲讒詔逮公訊所以引 二王者公具對侃侃至斷指出脛不易詞詔杖公百送刑部獄耶史君朝賓議從輕比而其長貳皆嵩黨竟當公詐傳親王令旨絞公之將受杖也或遺之蝻蛇膽却不受曰椒山自有膽或謂公勿怕公笑曰豈有怕打楊椒山者及繫刑部創甚吏畏禍莫敢覘公公乃自破瓷碗刺右股出血數升已復手小刃割左股去其腐肉旁觀者咸

為戰悚公顧自如在獄三年以乙卯十月晦死西市
臨刑賦詩云浩氣還太虛丹心照萬古平生未報恩
留作忠魂補天下相與涕泣傳誦之嗚呼士方平居
語及節義往往扼腕張睂目自謂能之一旦臨患害
僅如毛髮輒心悸色變不敢出一辭或走匿以規苟
免有能自奮如其言者寡矣未有蹈必死而不懼者
也偶出不意蹈一死及既脫率深自懲創毀方以為
圓又或自滿足不復肯為危言正色者有矣未有慷
慨激烈赴再死而不顧者也公始忤仇鸞偶不死奔
走絕塞間稍稍徵用去訊繫時無幾痛苦之狀宜猶

在心目張安人所以語公與古牛衣之說亦何以異
而公不懼不惑卒直諫以殞其生此其視唐子方諸
人且猶過之矧世碌碌者耶公死之歲刑部郎今藩
參王君世貞為求救於嵩所厚嵩曰行卜之其子世
蕃不可而其黨鄢懋卿等亦相與爭曰不殺某所謂
養虎自貽患也故公竟死公死而地為震者累年其
後給事中今中丞吳君時來刑部主事今中丞張君
紳太僕卿董君傳策相繼論嵩嵩又將殺之奏上地
忽震

先皇帝悟而止由此觀之精誠之至天地且為之動

矣嵩業已仇公等其必欲殺公不足怪彼黨嵩者獨何心哉夫其導嵩以殺公恐遺患也然公死七年

先皇帝用御史今中丞鄒君應龍言罷嵩政逮世蕃謫戍嶺南又二年御史今中丞林君濶發世蕃逆狀詔棄市籍其家則夫所謂患者果可以計免否也公死時應尾尚幼藩參君與其友吳君國倫徐君中行宗君臣倡諸縉紳經紀其後事兵部主事今中丞王君遴歸公喪且以女婚其次子由是諸君者相繼獲罪而藩參家禍尤酷今十有二年公既受恩卹於朝又以御史郝君杰請建祠保定賜額曰旌忠諸君亦

次第登用而嵩之黨則盡已斥逐嗚呼後之欲爲君子小人者可以鑒矣公先世小興州人洪武中有諱伯源者奉詔徙容城傳四世至青青生贈兵部署員外郎富是爲公考公生以正德丙子五月十七日年僅四十子二長卽應尾次日應箕皆張安人出昔歲甲辰公領鄉薦卒業國學予時爲祭酒奇公文因日進公爲講說經義與所以立身事君者公亦不鄙而聽之故予與公相知深公死予悲之倍於衆數謀於中丞王君視諸孤而日跂望於恩卹之及去年幸聞末議然後所以悲君者獲少紓萬一焉

某月某日應

尾應箕改葬公定興縣東引村之原奉藩參君狀來
徵銘予義不得辭也爲撫公大節俾歸而納諸墓中
若公居家之行狄道之政詳具公所爲年譜及藩參
君狀銘曰萬物稟氣以爲命公生其中得厥正位卑
身仆益自奮君恩必報以死殉人心爲憤地爲震歲
星一終天乃定羣奸澌滅主神聖易名建祠錫贈廢
制訶前後相輝映嗟公一死重敦竝我銘揭之爲世
鏡

旌忠祠碑記

僊居吳時來撰

今皇帝御宇首遵遺詔錄諸直諫臣生者敘用死
者贈官祭葬錄其子有差於是兵部武選司員外容
城椒山楊公得贈中順大夫太常寺少卿廕一子應
尾爲國子生薄海以內郊壘之衆與夫樵兒牧豎無
不悲酸以爲先皇帝之明且仁能鑒公忠誠於憑几之夕也又莫
不曰新天子之孝且仁能急於繼

先皇帝之志卹其遺忠於嗣服之初也乃商人白受
采等奏願捐貲以祠公於都城弗報容城士民走上
官欲祠公於其邑保定士民走上官欲祠公於其郡
副使曹君金因以士民之意白巡撫都御史曹公禮
出庫金畀容城立祠旣給事中陳君瓚以謚請則詔
賜謚曰忠愍旣巡按御史郝公杰以祠請則詔賜祠
曰旌忠嗚呼公之忠天下之達忠也其誦公之冤而
欲得公以祭者蓋徹乎百世無論商賈暨其鄉人然
則朝廷所以爲公者夫亦至矣書曰表厥里宅樹之
風聲嗚呼於公何有哉祠成將以某月某日奉公主

卽祠而血食焉應尾以予聞風於公者乃丐記其祠
事予奚忍詞公哉當公之抗疏也予正赴禮部試與
同志上虞陳君綰都勻陳君珊六七子會文於觀音
寺之佛堂客有從外來者謂公杖垂死且擬刑會中
人驚起屏氣予投筆曰夫如是將焉文以我能執白
麻往訴之二陳君曰誠然願尾子姓名其明日以草
視二陳君二陳君曰聞當官業有持獄者其毋亟試
而舉爲之不愈乎乃寢夫宜春父子之甘心於公甯
慮遺患哉亦以懼夫繼公而言者愚矣愚矣國家養
士二百年深仁厚澤霽霈海內卽不遠稽當議禮議

獄之時士之奮其間者以百計其死杖下老成所者
踵相接蓋已消阻無纖悉氣矣乃太僕西川楊公侍
御關西楊公皆以強諫起至於宜春父子竊弄威柄
言者類獲重譴卒不能禁止公尤竭志盡詞不遺餘
力斯所謂愈出而愈奇也乾坤正氣在天爲日月風
雷雨雪在地爲江河嶽鎮生則爲人則爲忠爲孝爲
盛德爲大業死則爲明神薄日月激風霆和雨露探
霜雪浩江河峙山嶽誰爲爲之誰爲止之公卽不在
世間而其震動天地激勵人心百世如生余獨以後
死遭逢全盛雨露不殊枯榮異勢嗚呼余甚慚於公

公赴義之詩曰生前未了事留與後人補又曰平生
未報恩留作忠魂補公以忠魂補乃誠補矣公之事
定矣余獨後人幸一息尚存則視公一息皆餘生恩
奚從報事奚從了故曰余甚慚乎公勉慎脩履庶幾
哉貞婦無負白首余甚懼焉余甚懼焉公少也孤卽
以忠義自許初舉於鄉入太學從事華亭徐公學文
乃遂見道旣舉進士從事苑洛韓公學樂乃遂知音
及謁闕里過泰山明義利生死之關而悟學無止法
適北事孔棘誓掃邊塵時仇鸞怙勢爲開馬市之議
力言其不可者十爲說謬者五鑿鑿據經爲鸞所中

被撻降狄道典史鸞誅四陞進武選司員外公思國
家屢陞厚恩欲舍身圖報至秉燭獨坐夜深不寐乃
感於宜人之言遂草疏列故相嚴嵩誤國十大罪五
大奸比入朝未浹旬也疏上
天子動容卒以嵩旁語乃下於理中以引用公二王
之故徧受諸杖具不屈遂被大杖擬重獄竟以奸嵩
曲計附失律諸人後槩卽命焉寃哉刑而及於諫臣
蓋今古未兩也公精忠奇節炳耀國史然人能知公
之忠於劾嚴相不知其阻馬市之議爲塞開邊大覺
人知

先皇帝之卒去嚴氏而不知公之言先爲之投種人知
今天子之能卹公不知危疑之際賴公以發其奸爲
有功於朝廷如公者忠莫忠焉而具茲三偉功厥祠
宜永世祠定址於保定從郝君請也費取諸官帑合
都御史曹公所畀金而成之也董其成則知府某也
乃紀其事而歌以侑神其歌曰名嶽降靈來太行聰
明正直剛以方騎雲而下三輔彭秉節委質何相羊
奸諛得志越厥常國事日非寵賂章逆黨扇禍釁啟
疆駕言馬市爲國殃公怒衝髮抗厥章中遭憂患謫
西羌逆誅被詔服上襄天子隆恩不敢忘投身報

主臣道常稽首萬言慨以慷嵩禍甚鸞何可長臣身
 不辭塗干將 天子動色心徜徉奸臣膽落走且僵
 視死如飴氣彌揚竟以形化返故鄉臨義之音何恨
 恨披依五雲肝與腸 帝曰朕有遺直古忠良何以
 旌之豐其藏以葬以祭泉壤光錫之祠宇鎮北方泥
 金有勅何輝煌魂兮豈不來洋洋公昔遊魂七陵旁
 假翼天路景雲翔逝如驚電掣天荒此驩之人徒俚
 偃公歸不歸歸有龐儻獨有靈來青揚聞其風者氣
 復昌憑人萬古扶綱常匪直人也獲其祥等河配嶽
 八且長

旌忠祠碑記

淮南李春芳撰

隆慶二年巡按直隸監察御史 臣 郝杰言 臣 所部保
 定府故贈太常少卿楊繼盛產地也其吏民為請立
 祠哀死勸生以詔永禩謹奏闕下候可 上從之賜
 祠曰旌忠於是保定守賈君淇繙閱故牘得前都御
 史曹公享副使曹君金何君東序捐公羨為公墓祠
 未竟事有金若干因四倍之卜地城西門庀材鳩工
 埏埴繩鋸中三楹以居公像而兩亭其旁刻公所為
 二疏者翼廡重門戟而環之軒軒肅肅道路流涕於

是鐘石爲碑以辭屬余余與公同舉進士而心高其義爲之碑曰公諱繼盛字仲芳少時家貧常爲其兄飯牛云然性嗜學不辭勤苦以就其業嘉靖丁未舉進士授南京吏部主事地閒務簡遂其以餘力問典章於鄭公曉論樂於韓公邦奇講聖賢之學於大儒先生已遷兵部員外郎當是時□薄都城方得氣去而咸甯侯仇鸞驟貴用事兵政屬焉鸞欲與□通馬市以羈□而固權公乃抗疏論其十不可五謬大指謂市馬者和議之別名也非國家所以內自完而讐服狡□之道也其弊必至於廢邊防深敵師損國威不可以善後其說甚具中肯綮而逆於鸞遂下錦衣獄貶爲狄道縣典史無何而鸞族誅乃卽貶所起公南京戶部主事三日而遷刑部員外郎改兵部員外郎當是時分宜嚴亦誼公而惡鸞欲引公之重以自爲也公聞之笑曰去一鸞復就一鸞天下有烈士丈夫爲匪人用者耶且天下苦公久矣毋使滋禍於是具疏數嚴大罪十而

陛下所以不知者以嵩有大奸五其道貞其行獨其氣奮其詞深覈而不浮剴切而詳白累累蓋數萬言夫人情莫不嚮其所榮而恩其所知就其所便而不

趨其所苦公起顛顛還中朝嚴方自以爲功而公裁以大義歸身於國曩者糜爛垂挺慘於鋸鑿瘡痍未合而科編之章再上頸可鑿舌不可斷身可殺心不可折非質忠性義有滂勃糾纏於中而不可散解者耶使公疏而用海內早卽衽席之安朝廷晏如也是時也嚴輒能移主上心遂復下詔獄杖至百論死居二歲嘉靖乙卯十月晦而竟死西市矣又七歲而嚴免遂不得良死又五歲而其代領遺詔贈公太常少卿錄其子賜諡忠愍祠焉於戲休哉夫公所以報主上與主上之報

公者豈不交厚耶人臣錄於朝頂踵皆主恩也故不以君之識不識而死其官所以報非以求報也故曰公厚然論定於久而賞溢乎制亦不問事之成不成而報忠優於報功故曰主上厚人謂

先皇帝神鞠寔誅卒戮大愆不爽而公以不幸先其禍痛憤何極然不痛憤又何以章忠臣之節與先皇帝今上咨嗟崇獎至意哉故世必有大痛而後大快之斯公之所爲垂譽長久者耶所爲祠者本發於三疏予故表公大節而畧其他且爲辭以侑神焉辭曰流旭兮旦開照靈旂兮驅昏霾輪迴焱兮左

黔雷團元氣兮惠來帝嘉女兮怛女撫女壯兮下土
彎天弓兮殪天狼血含光兮注牙幢載逢干兮與俱
行青虬兮白螭雲中兮遨嬉厲予齟兮上谷滌予腸
兮桑乾靈來兮不來不來兮心悲彭咸參兮萇弘伍
靈番番兮肅然而來下為民正兮終古羗焉窮兮社
而稷女

忠愍楊公祠堂記

崇陽汪宗伊撰

夫國於天地與有立焉甯獨其法制具哉蓋必有忠
貞敢諫之臣能摘主闕推權奸力圖公室之安即九
隕其身初不為回向易慮以成其義若是者蓋古今
賴之當
世廟時忠愍楊公以車駕員外郎疏折勳幸臣仇鸞
摘尉狄道亡何鸞敗
世廟心內直公一歲四遷至武選員外時分宜方馮
寵恣睢瀆朝政公欲因癸丑歲旦日食上狀寤主即

於歲暮之塗次削草疾馳入京師予幸與公同曹晨
從錦衣後竝騎道上行適前驅者至謂日當食詔罷
習儀公因過予邸舍故秘之會元旦雪禮臣請更爲
賀官家欲罪諸靈臺占侯郎而同曹主事陳君一松
聞以耳語予因密請公疏且緩入比銀臺亦以節假
禁封章至望後三日公疏方上言分宜罪狀十奸五
可名問之二王知之分宜固挾此爲讒遂復逮錦衣
衛詔獄而疏中言嚴鵠冒功事下曹覆奏分宜子世
蕃預爲覆草以受其黨江曹郎冕袖囑主覆者周曹
郎冕周曰嗟乎是可忍也予從旁益從吏周君謂覆
疏如所指獨不爲楊地卽國例公論謂何於是周力
陳其冒功謂一世所共知并以分宜奸狀上聞已
復逮周下獄出爲民予亦以內批罷官公竟從吏訊
赴西市嗟嗟以公之才其卓犖閎偉無論其他卽太
乙王奇堪輿兵陣諸家書亦皆綜習居嘗議天下事
亶亶若泉注其論謫賜環後藉令苟以世俗爲心卽
隱忍就例可立取通顯乃身再詔獄斷指節出脛骨
繼以割肉擢筋流血數升將卒猶賦詩以見志非夫
天植其忠能然哉顧予獨有感於
世廟之明以公之忠而竟陷死地豈非以奸臣柄事

卷四

三

羅織成族義難自明而予顧遇熙際復起至今官迺
知士所遇有幸有不幸而於心固當不易云然
世廟末載罷分宜械其子棄市并籍其家而公以
遺詔贈貳奉常廕子一賜祠額曰旌忠卽童稚至今
談者猶切齒嚴氏艷慕公神明故士所自處在彼不
在此亦較然矣至於嚴黨旣盡朝政潔齊迄於今竝
稱熙洽雖猶明良相得致然而公之忠貞能使天下
國家所恃以竝立者益不可泯子故詳著之使世之
瞻拜祠下亦將有感於斯 祠在邑庠之左督撫劉
公應節孫公丕揚督學傅君孟春賀君一桂兵憲高

君文薦王君琬徐君學古知府劉君泮賈君仁元各
捐金助之而知縣王子德新張子與行相繼成之云
爾

萬曆八年歲次庚辰夏月吉日立石

萬初八平... 吳... 且立...
 金... 王... 隆慶... 保定...
 文... 王... 隆慶... 保定...

墓祠碑記

堂邑張鳳翔撰

容城楊忠愍公在嘉靖之季以論劾奸相嚴嵩遇害
 藁葬定興縣東引村至隆慶元年遵
 肅皇帝遺詔贈官賜諡予祭錄廕又錫祠於保定府
 額曰旌忠而後公之冤始白至今
 皇帝天啟三年俞臣翔之請予公諭葬蓋道行
 莊皇帝 顯皇帝所欲予而未及予者而後 朝廷
 所以卹公之典始備然公東引村墓距直道尚三里
 許獨墓碑在道側凡往來其下者率徘徊歛噓而不

能去天啟四年夏翔被召爲少司馬瀕行與定興令
王君永吉謀卽碑所建墓祠塑公像以便瞻拜憑弔
與保定之旌忠者相望而後民間所以風公之烈始
久嗚呼古忠臣烈士不幸而死於奸臣之手如伯嚭
之殺伍子胥王鳳之殺王章曹操之殺孔文舉王敦
之殺周伯起李林甫之殺李北海盧杞之殺顏魯公
秦檜之殺岳武穆者非一而獨公與武穆至今英雄
之恨未銷雖小夫婦人孺子皆能誦姓名而感憤流
涕所在祠廟不絕豈非其忠最烈而禍最酷哉然武
穆死宋遂以不振公死而

肅皇帝感悟誅奸行公之所論列蓋予聞之故老公
死踰時

肅皇帝尙惓惓問公獄意欲釋而用之方知相嵩附
公名他獄辭以陷於死從此遂燭嵩奸而鄒公應龍
林公潤得相繼奏其力則公一死不惟無損
肅宗日月之明益增嘉靖中興之績古云殺其身有
益於君則爲之公之謂也夫公所欲誅者奸臣而奸
臣已誅所欲寤者主心而主心已寤所欲留後人補
以報者主恩而主恩已報然則英雄之恨雖未銷而
公之恨已無不銷蓋其殺身成仁舍生取義其存其

歿社稷均賴之非區區以烈士殉名論也而後之爲公惜者或謂身非言責死過於忠或謂公才兼文武律歷兵戎主眷方隆圖報有所不宜僅以言死或謂誤引二王開奸人以羅織之釁夫其時言路皆奸黨也公安得勿言害無大於嵩則報無大於去嵩公何惜一死且奸人設弇奚患無辭以嵩世蕃賊虐而冀以胡植鄢懋卿何鼈王學益曹天佑李天榮劉檟輩公卽不詞及二王豈無所以死公者此皆身名與君父較重輕揣利害其見反出小夫婦人孺子下又安足與知公之心哉公死迄今七十餘年而人

心之思慕者如一日吾知過此事會感激捐軀弘濟賢者當必師公所爲卽小夫婦人孺子亦將有取嵩世蕃植懋卿諸兇人像貌跪仆公之階庭快榜擊以懼奸邪如武穆祠焉則英雄之恨未銷正公有功於千百不死之人心矣當時不避患難周旋公者都御史王公遴大司寇王公世貞比部郎史公朝賓邱公秉文應公明首請錄公忠者冢宰楊公博請諡公者御史陳公瓚請祠公保定者御史郝公杰題公墓迄碑者冢宰孫公丕揚今捨地爲公祠基者邑孝廉范子士楫而畢力建祠費不煩民役不稽時昭往勸來

助流教化者邑令王公永吉也此其人姓名皆當與
公俱不朽凡公墓祠規制始於年月日詳具王令公
所自爲記中若其廟貌巖巖翼翼肅然興起則予異日尙
當趨拜而弔賦焉 銘曰嗚呼號孚以爲厲鳩壯決
也管日以爲明斗沫晰也謂忠爲無益井可濶也割
聖之刃還缺折也敦脈血拊用自嚙也噲正而噉冥
辛夷揆也揮虹以遁蜺靈旗揭也會唵恒悲無穉臺
也伊彭咸之故居引村以東轍也死乎不死乎俊與
傑也

重修楊忠愍先生祠記

歲寒居士孫奇逢撰

楊忠愍先生賜祠之在保定暨容城與墓門者有三
而郡西郭之有祠則自太守武公文達始迄今五十
餘年矣敗瓦頽垣不可以妥靈爽唯餘丐豎雜處於
寒烟烈日中仰止者無所寄其憑弔歲甲辰予北歸
過上谷魏子一鰲言之意愀然而力未能也嗣常公
大忠以名進士來佐郡慨欲修復之魏子得拮据贊
其成寓書蘇門來問記夫先生之名卽深山窮谷販
夫野老無不知之逢又何容贅一辭予惟先生所學

隱而未彰今日修復之舉得觀厥成抑梓里後學者之大幸也乃不辭耄年衰筆而爲之記予嘗思之凡今之仰止者大都曰以忠諫而死先生當日力欲除奸反以觸奸而死卒以先生一死而奸乃誅并誅其逆子惡黨先生之以諫死可謂忠矣而忠可謂仁矣予竊觀先生之學得之造化之源非獨以忠節見也先生年譜記受律呂之學於韓苑洛公邦奇三月而得其數乃播之聲音各相和諧苑洛欲制十二律之管每管備五音七聲各成一調先生精思連三口夜而樂成嗚呼先生豈僅以忠節見哉卽此可槩其全

體矣夫世之談聖學者必稱六經然五經各有專業而樂則滅絕無傳論治法者必對舉禮樂然議禮者於天秩不易之外猶深求立異可喜之說至於樂則廢棄不講全德之微風俗之敝職此之故先生序志樂有云信手拈來觸處皆合樂之爲道嗚呼先生豈僅以樂見哉黃帝制律呂與伏羲畫卦大禹衍疇同功然卦疇得程朱諸子而始著律呂得先生而始明則其功豈曰小補云乎哉或曰羨里之厄正欲衍大易以利民用正士之囚復欲陳洪範以正民彝先生當日一卽署耳履虎尾而見唾蹈堅冰而遂殞毋乃

非用易衍疇之旨乎予曰否否體貴守其常用貴達其變先生當世廟無事時分宜之奸尚欲收先生以爲用重陰肆蔽五行汨陳而當世之大臣曾無一人正其罪者嗚呼澤下水決溝壑發志士之光木稿澤中過涉存獨立之意事君值泰否之會旣知其禍敗必反覆陳諫諫之可則君享其安諫之不可則身與其辱辱之不可而後去之去之不可而後死之古之聖人贊易繫辭未嘗不通於義命非守常達變之道乎先生所云信手拈來觸處皆合樂之爲道正所以合用易陳疇之道乎先生在狄道時爲道統祠由義

昌周孔以至周程張朱劉靜脩薛文清亦與焉顛沛降謫番漢難理之地而猶諄諄以興學自任先生所得力於學者又豈特律呂之自見耶常公今日復脩之舉不獨誅千古殺諫臣之奸慝媿千古不指佞之言官正欲以興千古不漸滅之學脉世道人心將終於此胥賴焉乃述先生未彰之學術用告後世至脩建之次第工料之補葺祠宇併廊廡大門儀門皆一時脩復牆圍以磚坊樹以木工多而費省巍然稱鉅觀焉是役也常公捐俸首倡而郡縣賢長吏與縉紳士庶皆欣然出囊橐以應至始終區畫拮据督理者

則魏子一鰲與劉君履昌也朝夕課工收支出入者
則生員薛立揚鄉耆潘進善也經始於乙巳六月告
成於丙午二月例得勒之石云

卷四
三

讀揚忠愍公年譜敬賦

譜爲信山胡先生
重刊故句中及之

吳江計 默撰

少慕忠愍公高山賦仰止抗疏劾仇鸞誤國在馬市
鸞勢方寵盛朝臣任臂使公旣罹廷杖謫尉亦莞爾
再起諸城令副郎職轉徙一歲幾遷官感恩從此始
維時嚴相國閔不畏天咫十罪與五奸特糾重忤旨
舉朝半黨惡急欲公身死公死豈敢惜國事奈傾圮
嗚呼公大節歷歷炳前史詎知天下才涉境慘無似
弱齡失怙恃依依兄及姊書嘗掛牛角吟不輟耒耜
詩筆都縱橫米鹽且經紀挺身救兄獄訟白不受捶

學更工律呂淵博無涯渙偉業既足多區區此小技
 年譜事具在允是奇男子默也服膺甚理學得源委
 當其著譜時盡節日伊邇臣精殆銷亡色變心悸矣
 家事縱巨細誰其主張是公獨搖筆書一一詳側理
 臨危見定力養氣功不靡豈必忠魂杳對此恍瞻視
 刊譜務表幽風感頌忠良斯人如可作執鞭我亦喜

慕忠烈公高山頽呼也壯氣恢於驚野固亦見市

吳武清 吳時

楊椒山先生集卷之四 終

板存杭州 文堂書坊



